

Pour Messire Eleonor d'Estampes de Valencay, Archeuesque Duc de Reims, premier Pair de France, deffendeur.

*Contre Messire Henry de Sauoye de Nemours Duc Daumalle,
Abbé de S. Remy de Reims, demandeur.*



A question qui se presente à iuger est de sçauoir si Monsieur l'Archeuesque de Reims est obligé de contribuer au paiement d'une pension de dix mil liures tournois, qu'il n'a iamais promise, accordée ny consentie, de laquelle Monsieur de Nemours est expressement chargé par son Breuet de nomination, & qu'il a volontairement payée & continuée sans demander aucun recours contre le deffendeur.

Il est constant au procez qu'en 1622. l'Abbaye de S. Remy estant vnue à l'Archeuesché de Reims, le Roy donna à Monsieur le Duc de Cheureuse dix mil tournois de pension à prendre sur les fruits dudit Archeuesché & de ladite Abbaye S. Remy vnus ensemble.

Cette vnion ayant cessé par la volonté du Roy, l'Archeuesché fut donné à Messire Gabriel de sainte Marie Religieux Benedictin, & l'Abbaye S. Remy à Monsieur le Duc de Guise, lequel a tousiours payé cette pension de dix mil liures à Monsieur le Duc de Cheureuse son oncle, sans en demander ny faire payer aucune portion audit sieur Archeuesque de Reims.

Depuis Mr de Guise ayant esté pourueu & dudit Archeuesché & de ladite Abbaye a payé & continué la pension de dix mil liures tournois comme Abbé, ainsi qu'il la payoit auant qu'il fut nommé audit Archeuesché, les comptes qui ont esté rendus du reuenue de ladite Abbaye sont entierement chargez de cette pension de dix mil liures tournois, dont il n'est point parlé en ceux de l'Archeuesché.

En 641. il pleust au Roy de donner l'Archeuesché de Reims au deffendeur, qui fut contraint remettre entre les mains de sa Majesté l'Euesché de Chartres, pour lors de plus grand reuenue quel'Archeuesché de Reims, le deffendeur auoit regret de quitter cet Euesché, tant pour les grands & beaux accommodements faits en iceluy non sans grande despenze, que pource qu'il luy falloit plus de soixante mil liures pour les Bulles & reparations des lieux & fermes dudit Archeuesché.

Comme il remettoit l'Euesché sans aucune charge ny reserue de pension, de mesmes sa Majesté luy donna l'Archeuesché sans aucune charge ny reserue de pension, le Breuet du deffendeur

17

est pur & simple, & ne parle en façon quelconque de la pension de dix mil liures, non plus que ses Bulles.

En ce mesme temps Monsieur le Duc Daumalle a esté nommé à l'Abbaye S. Remy, à la charge de dix mil liures de pension pour Monsieur le Duc de Cheureuse, & de cinq mil liures pour Messieurs les Cheualiers de Guise, lesdites pensions cy-deuant créées sur ladite Abbaye.

Suiuant ce Breuet Monsieur Daumalle a enuoié en Cour de Rome, fait signer vne supplique & demandé des Bulles de cette Abbaye, à condition expresse de ces deux pensions de dix mil liures tournois d'une part, & cinq mil liures tournois d'autre, comme il est iustificié au procez.

On a rendu compte des fruits & de l'Archeuesché & de l'Abbaye pardeuant Messieurs les Commissaires deputez par le Roy en presence de Monsieur le Duc Daumalle & dudit sieur Archeuesque, dans ce compte l'Abbaye est demeuré chargée des pensions, partie des fruits d'icelle employez au payement des arrerages, sans que l'Archeuesché en ayt payé aucune chose, le tout du consentement de Monsieur Daumalle, & de ceux qui auoient pouuoir de luy, & la couduitte de ses affaires.

Est arriué que Monsieur le Duc de Cheureuse ayant poursuui ledit sieur Duc Daumalle pour le payement de sa pension, ceux qui ont charge de ses affaires se sont aduisez de pretendre que cette pension de dix mil liures ayant esté assignée sur les fruits dudit Archeuesché & de ladite Abbaye lors vnis Monsieur l'Archeuesque en debuioit sa part & portion, & pour autoriser cette imagination ils ont fait donner vn Arrest du Conseil le 15. Decembre 1643. par lequel il a esté ordonné que ledit sieur Archeuesque seroit assigné au Conseil pour respondre aux pretentions de Monsieur le Duc Daumalle lequel est condamné par prouision à payer cinq huitiemes de cette pension.

Monsieur l'Archeuesque de Reims soustient qu'il ne doit rien de cette pension.

Primò, il ne l'a iamais acceptée ny promise; son Breuet de nomination est pur & simple, ne parle en façon quelconque de cette pension, de laquelle s'il eust voulu le charger, il n'eust iamais quitté son Euesché libre pour prendre vn Archeuesché chargé de pension.

Secundò, Les Bulles de l'Archeuesché ne parlent point de cette pension, laquelle n'a point esté créée en Cour de Rome, ainsi elle depend de la pure volonté de sa Maiesté, l'ayant assignée par vn simple Breuet, sa Maiesté a peu en descharger l'Archeuesché, & la transinettre sur l'Abbaye par vn simple Breuet, *nihil est tam naturale quam unumquodque eodem modo quo ligatum est dissolui.*

Enfin les pensions sur Cures sont abusiuës, & ne passent point aux successeurs par mort, iugé par les Arrests rapportez par M. Anne Robert, entre lesquels est celui qui a cassé vne pension

3

crée sur l'Euësché de Luçon, de sorte qu'une pension sur l'Archeuesché de Reims qui a la Cure des Cures ne pourroit estre soufferte ny tolerée suiuant les Arrests.

Au contraire Monsieur Daumalle est tenu de payer entiere-ment cette pension de dix mil liures tournois

Primò, il est chargé par le Breuet de nomination qu'il a pris & accepté à cette condition de payer la pension de dix mil liures, assignée par le mesme Breuet sur cette Abbaye.

En second lieu, il a enuoyé à Rome les lettres de nomination de sa Majesté, & chargé le Banquier de faire signer la Supplique, mesme expedier les Bulles avec cette charge de dix mil liures de pension pour Monsieur le Duc de Cheureuse; comme il est iustificié par l'extrait du Registre de M. François Parisot son Banquier au feuillet 175. *reçû*, qui contient ces mots (*ex commissione Serenissimi oratoris Principis Henrici de Sauoye de Nemours*, & plus bas, *Et cum onere pensionis autoritate Apostolica creata decem millium librarum turonenfium, in fauorem Serenissimi Principis Claudij de Lorraine Ducis de Cheureuse*, laquelle Supplique est signée & datée à Rome, *apud sanctum Petram quinto Idus Februarij anno decimo nono id est die nona Februarij 1642*. En suite de quoy sur le certificat dudit Parisot, & en vertu d'un Arrest rendu sur iceluy, ledit sieur Duc Daumalle s'est mis en possession de ladite Abbaye S. Remy de Reims, à iouir des fruits & reuenus avec cette charge & condition expresse de dix mil liures de pension créé en Cour de Rome bien & deuëment sur sa Supplique mesme, qui est un moyen entierement decisiu.

Tertiò, depuis 1622. ceux qui ont esté pourueus de ladite Abbaye ont payé seuls la pension de dix mil liures tournois sans aucun recours contre les Archeuesques de Reims, qui n'ont rien payé ny contribué pour icelle.

Enfin Monsieur Daumalle & son Conseil ont volontairement & librement passé cette pension de dix mil liures au compte des fruits de cette Abbaye sans aucunes protestations ny reserue contre Monsieur l'Archeuesque de Reims present, auquel on n'a rien demandé ny fait payer de cette pension, dont partant il ne peut estre tenu en façon quelconque.

Ne sert de dire que par le Breuet accordé à Monsieur le Duc de Cheureuse la pension de dix mil liures tournois a esté assignee sur les fruits de l'Archeuesché & de ladite Abbaye, que par le Breuet dudit sieur Archeuesque, il n'est point expressement deschargé de la pension, que de verité Monsieur Daumalle s'en trouue chargé par son Breuet, sur ce que l'on a fait entendre à sa Mayesté que la pension estoit crée sur ladite Abbaye, bref que par l'Arrest du Conseil on a preiugé que Monsieur l'Archeuesque en estoit tenu, puis que l'on a ordonné qu'il seroit assigné, & condamné les sieur Duc Daumalle es cinq huietmes de cette pension, & ainsi tacitement condamné ledit sieur Archeuesque à payer les trois autres.

Lors du Breuet de Monsieur de Cheuereuse l'Abbaye estoit vnüe à l'Archeuesché, ainsi on ne pouuoit créer vne pension sur l'Abbaye que les fruits de l'Archeuesché n'y fussent affectez & hypotequé, puis que les fruits de l'Abbaye estoient ceux de l'Archeuesché, mais apres la def. vnion en donnant des Breuets particuliers de ces benefices, le Roy iustement déclaré son intention, en chargeant l'Abbé & dechargeant l'Archeuesque, comme la pension auoit esté assigné par vn simple Breuet, elle a peu estre transferé par simple Breuet, sa Mayesté a considéré le grand reuenu de l'Abbaye & le peu de charges de l'Abbé, la modicité du reuenu & les grandes charges de l'Archeuesque, qui eust esté trop greué d'une si lourde pension, ayant dés-jà remis son Euesché de Chartres purement & simplement.

Monsieur l'Archeuesque n'a iamais payé cette pension ny portion d'icelle, que l'Abbé a tousiours acquité, dont il ne falloit point en descharger expressement l'Archeuesque, puis qu'il n'en a iamais esté chargé, & que son Breuet estant pur & simple il en demeure du tout quitte & deschargé.

Veu mesmes que Monsieur le Duc Daumalle par son Breuet en est expressement chargé, il a accepté ce Breuet, & en suite enuoyé à Rome, chargé le Banquier d'obtenir Bulles, *cum onere dictæ pensionis*, laquelle partant il a recogneu de buoir & payé volontairement lors du compte rendu deuant Messieurs les Commissaires.

Quand par le Breuet sa Maïesté a dit que les pensions auoient esté cy-deuant créées sur ladite Abbaye, il n'y a point eu de surprise pour ce regard, puis que lors de la creation l'Abbaye estoit vnüe à l'Archeuesché, que depuis la separation l'Abbé seul a esté chargé de cette pension par les Breuets de sa Maïesté, & qu'il l'a tousiours payée sans que l'Archeuesque y ayt contribué en façon quelconque.

Bref l'Arrest du Conseil n'a pas condamné Monsieur l'Archeuesque, puis qu'il a ordonné qu'il seroit assigné, on ne condamne pas au Conseil les parties sans les oïr auant que d'estre assignées.

Monsieur le Duc Daumalle a esté condamné payer les cinq huitièmes par prouision, iusques à ce qu'il soit condamné diffinitivement à payer la totalité de cette pension, qu'il a promis paier par son Breuet & ses Bulles, a tousiours païé & doit continuer à l'aduenir sans aucun recours contre Monsieur l'Archeuesque.

Si conclud Monsieur l'Archeuesque à ce qu'il soit enuoyé absous des fins & conelusions de Monsieur le Duc Daumale, mainleuée des saisies si aucunes ont esté faites avec despens dommages & interests.

Messieurs de Monichal & Dormesson, Rapporteurs.